

四庫全書

集部

欽定四庫全書

集部

宋元詩會卷

三十一

詳校官中書臣陸 湘

主事銜臣徐以坤覆勘

總校官知縣臣繆 琪

校對官中書臣牛稔文

謄錄監生臣沈世政

欽定四庫全書

宋元詩會卷三十

兵部主事陳焯編

彭汝礪

字器資鄱陽人治平二年進士第一授保信軍推官歷武安彰州書記推官王安石嘉其詩義擢太子中允既而惡之神宗用為監察御史裏行首陳十事力爭中人典兵之非上為改容元豐初出判江西運代還提刑京西超為起居舍人進中舍賜金紫會吳處厚上蔡確謗詩汝礪封還謫詞坐落職知徐州人權兵刑二侍拜吏部侍郎言者謂嘗附會劉摯降知江州哲宗問所欲言對以用人行

政政惟其是人惟其賢至郡數月而病朝廷將以密丞召用竟不及待卒年五十四

冬日道中作

夜卧衾裯單不敢嗟體寒晨餐蔬食微不敢歎腹饑重
念饑寒民亦有甚我身我心若嗟吁彼俗當何如

行西城

我將行西城曲指計日月汝來今幾時已卜錢塘別吾
哀况多病冉冉鬢已雪安能久去汝漫自投羈紲田園
苟可飯聲利非吾屑與汝歸去來相看至耄耄蒼茫尚

無淚空復愁如結

漢上謁劉執中

塵土能污人有如衣匪澣驅車出閨閣縱目盡江漢漁
舟泛青雲瀟灑雁為伴蘆花如飛雪時逐風散漫可憐
獨清人憔悴行澤畔

菊苗

重陽黃菊花零落殆無有微陽動淵泉嫩葉出枯朽青
青好顏色寂寂霜雪後物理如轉環人生豈能久

栽竹

一生正能著幾屐曠達人稱阮遥集何可一日無此君
風流我愛王參軍夏葛冬裘吾便足由來世間無可欲
但栽翠竹滿東林我日對之歌且吟

答同舍遊凝祥池

仙宮神靈之所宅樓閣倚天一千尺先生好遊猶挾冊
藜莧不慙五鼎食凝祥池頭三月春腰金騎犢多貴人
天邊五岳烟霞閣海上三山雨露新蛟蝶能飛燕能舞

鳳凰在霄鴻在渚仙人參鸞入雲霧寂寂不聞青鳥語
洞天將晚日沈沈漁舟縹緲桃源深紅玉坐看花著子
青雲行見葉成陰疾雷怒飛風雨急瘦馬不行歸旆濕
投間一日須一來歲時變化猶呼吸

惠州

霧暗山千疊冰寒水一涯風高天作雪日晚路迷沙居
士身如夢行人驛是家青燈無意緒點點自成花

道中

湖天冬不雪山地晚多風岸草猶全綠村花或自紅差
池歲聿暮寂寞雨其濛南北隨蓬轉浮生寄寓中

夜泊睦州桐江

一水連銀漢千山擁古城客乘清夜息舟倚碧溪橫皓
月危峰影清風細浪聲嘔啞殊俗語慘淡異鄉情

大小沙陀

南障古北口北控大沙陀土地稻粱少歲時霜雪多古
來長用武今日許通和豈乏嫖姚將君王悟止戈

內鄉招提寺

淫雨宿蕭寺白雲思楚山病催顏色老淚裛鬢毛斑流水終何極飛禽倦未還夢歸無別處鷺嶺鳳林關

和君時余未至君時言有羣鵲集

舊重千金諾元為五日期水清冰破玉巖潤石凝脂命駕不嫌遽舍車空悔遲多慙無道力有往鵲先知

和瑛師

江湖日夜著東流水上乾坤一點浮隔浦雲山隨客步

近村花竹慰人愁
同舟自有林宗在
結社還須惠遠遊
酒興正酣歸更懶
坐看涼月上滄洲

送宗文先輩

夫子聲名二十年
塵埃歎息欲華顛
相如舊有凌雲賦
靖節今無種秫田
南國寂寥歸見雁
北風悲壯屢聞蟬
思量世事真如幻
合置窮愁頓酒邊

山林

鶴瘦松枯不自禁
窮愁千緒欲相侵
山林誰識謝公意

風月獨高梁甫吟行視水痕嗟不息靜看雲影愛無心
懶隨塵土趨時態欲就絲桐勾古音

和張侍讀總翠亭

城隅東北起危亭卧桷飛簷控地形萬井不藏平野綠
一湖纔見遠山青春歸會圃低華幄雨歇寒蕪露翠屏
日暮登臨望樓闕誤隨飛鳥下南溟

余十一月甲申以使來武岡坐茅茨之室逼閭閻
之陋無故人往來之樂懷羈旅不足之情于是

出遊古山寺寺在縣西十五里而山水俊拔深
秀亦有可愛者因留置酒抵暮還驛而作是詩
淡日沙村晚霜晴溪路遙蠻人瞻虎節田父看星軺使
指勤咨問君恩費養調畏途諳跋涉道策問芻蕘臘近
雲長暝春遲雪未消遠空低幕帶疊嶂露瓊瑤板屋誰
家舍茅簷何處橋梅香浮遠水藤古上重霄細草眠黃
犢巔崖落皂鵬兒童晴出牧婦女晚歸樵椎髻騎吹笛
斑衣行踏謡封疆連五嶺習俗帶三苗孤鼠威溪老豺

狼脫洞驕今當蒙潤澤久已靜氛妖歌舞隨鄉地耕桑
託聖朝威儀欣用古姓氏恥稱猛僧至不千里寺名非
一朝小亭浮草莽高閣出岩窵泉細能沾潤峰危欲動
搖會觀禪味足還見講花飄茶汎波無跡香深篆未消
遠遊貪物象久客厭塵囂子美詩千首淵明醉一瓢儻
來淹白晝輕去恨連宵野色隨行李灘聲逐畫橈烏歸
浮漠漠旌旋雨蕭蕭淡月生昭曠青燈照寂寥歲時惟
箭激江海祇萍漂洪井連廬阜蒲山近斗杓且從周夢

去莫作楚魂招

送劉器之待制知真定府

時平謀帥重侍從輟名卿龍種三千騎虬髯十萬兵紅
蓮王儉幕細柳亞夫營側道諸侯謁還鄉故老迎試詢
三將宅因過五梁城漫樂潭園勝難忘魏闕情守株嗟
我老杖鉞壯公行祗恐非朝夕君王台賈生

和國信子育元韻

雪餘稅馬立孱顏望盡南垂北際山一段黃雲凝不散

居人說是瓦橋關

泊真州新河亭

鬢毛垂雪欲瑣瑣道路風波老不堪繫纜短亭聊自慰
青山數點見江南

鄭俠

字介夫福清人治平中隨父官江寧閉戶苦學王
安石知其名邀與相見稱獎之舉進士高第調光
州司法參軍值安石居政府凡所施行民間不以
為便俠感舊知思欲盡忠會秩滿入都三往見之
安石問以外間輦見俠對曰青苗免役諸事在俠
心不能無區區也安石弗荅俠退不復見但數移

書言法之為民害者久之監安上門安石雖不悅猶使其子雱及門客黎東美諭意欲辟為修經局簡討使曰讀書無幾不足以辱簡討相君果欲援俠而成就之取其所獻利民便物之事施行一二足矣是時自熙寧六年七月不雨至於七年三月人無生意東北流民累累在道鵠面鵠形茹草木不給仍以官逋身被鎖械俠知安石不可諫悉繪為圖假稱密急發馬逋上之銀臺司神宗得所奏圖反覆觀之竟夕不寐翼日命罷免新法權息追呼因下責躬詔求言三日大雨輔臣入賀帝示以俠所進圖用是羣奸切齒安石上章求去而呂惠卿鄧綰環泣上前詆俠為狂夫阻撓美政故新法一切如故仍奏俠為謗訕編管汀州賴帝意不許但徙英州徽宗立赦復故官又為蔡京所奪宣和元年卒年七十九

贈雲門居士

雲門山口雲徘徊居士道與山崔嵬清時肥遁古亦有
驚猿怨鶴今誰偕居士高卧白雲堆山門時為猿鶴開
溪花野草自春色雲芝石筍寧須栽輭蒸抱石傾新醅
麋鹿慣我還無猜寧知玉署思賢切御手調羹待客來
次韻种師道行衙賞蓮花

城中勢利如聚蛙聒聒鼓開窮兩衙忽聳攜樽命真賞
如見地涌金蓮花况兹危亭跨高爽極目四顧窮天涯

紅蕖綠遶已數畝盛妝翠蓋相撐擎輿肩不換足已到
咫尺異彼窮幽遐居之自可換凡骨不必飲露餐朝霞
行杯對奕較勝負往往笑語成譁譁歸來清風恐飄帽
月影已向西樓斜長舒兩腳就枕簟一覺一聽清晨笳

示廬山寺老勝師

離鄉十九年日有如年久歸來山水亦依然人物存亡
半非舊廬阜之前我舅宅此寺如我東西家每來舅家
必到此粵自齒稚今疎牙庾嶺閩山四千里青衫謫逐

自我始築臺東望幾悽涼親故滿前爭不喜林下相逢
真實人執手忘言行處親還家一百二十日五回松下
問禪因師住無住我非動來不須迎去不送大千沙界
等閒看尋常只把毫端弄

和叔粲滄浪亭

高亭矗矗水泠泠笑指鷗鳬坐晚汀遠不聞聲千櫓去
矯如爭秀數峰青烟雲牕牖紛紛雨露月蒹葭點點星
最好歸輿擁雙壁笙歌燈火照仙屏

同子忠上西樓

偶因送客上西樓，共愛佳城枕海陬。
雁翅人家千巷陌，犬牙商舶數汀洲。
風吹細雨兼秋淨，雲漏疎星帶水流。
獨有單親頭蚤白，迢迢東望不勝愁。

幽居

蕭條深巷寄門牆，城郭村居事異常。
石展地衣三藥徑，錦圍天柱十花檣。
幽禽隔樹鈎輶語，異草搖風合和香。
不覺冬歸與春到，但知無事日偏長。

示潮州妹子

八人兄弟三人在獨立他州信汝賢直使無情如槁木
忍看垂淚念南遷從今依舊歌泉水何物偏宜寄謫仙
美酒年年須百甕好從南海便乘船

王令

字逢原廣陵人鄭州管城主簿世倫之子五歲而
孤長從王安石遊期以遠到年二十八竟天死葬
武進縣安石為之銘曰始予愛其文章而得其所
以言中予愛其節行而得其所以行慨然賀以為
可任天子之重而有功于天下者今棄予
而死矣妻吳氏即荆公夫人之女弟也

答東徽之索詩

世味久已諳多惡竟少好惟詩素所嗜決切欲深造人
安已不休衆恥我獨冒有如獺行跡欲改復自蹈肝腸
困摻尋吻舌倦搏造心靈無餘多為此日有耗已勤尚
無成既苦每自勞自笑如秋蟬饑極不止噪努力排韓
門屈拜媚孟竈惟此二公才百牛飽懷抱我如餓旁者
眇眇不得撓不知去幾多窮行竟未到無門隔藩籬發
罅窺堂與愛之不可入抵觸發狂躁借使苟有成不知

竟何要孤名非所求
樊俗詎足傲况乃非所及
窮海未為浩不知何時休
定訖死與耄因疑今世人
恐有我同操徽之才超
高竿幢出標纛為學尚淹
蘊富索不肯暴文章內
朱豹外襲一以皂大論
尤堅強推舟出行弄珉
砮不施功徑欲制珪瑁
幸此不我陋教誨日陳
告昨因語及詩請我使
自道屢謝不得命迫窄
遂顛倒披堅誘羸兵
伏銳待穿盜取勝雖
必然窘窮亦堪悼
勉為瓦礫投幸有金珠報

秋夜

秋夕不自曉百蟲齊一鳴時節適使然鼓脅亦有聲爭
喧鼠公盜憲宰蛇陰行獨有東家雞苦心為昏明

弱弱誰氏子

弱弱誰氏子鮮鮮一何姝來奔富人家妻與富人俱嚴
妝問夫子我豈彼室如夫子笑遣之彼寧與汝都升堂
由阼階德色溢以舒親賓不敢笑退語相囑吁高堂聚
羣婢唯諾相恣睢家事忽不圖顧指取自如朝令折桂

新暮遣藩籬除風雨半夜來百覺生不虞屋壓盜隨至
夫死別嫁夫東鄰有淑子性不事鉛朱端居待人求正
色不願諛清鏡見白髮行媒不顧閭不知愛妻人取捨
何異歟

雜詩二首

方春不種蘭終歲無自佩良田弗加芟徒穉亦無歲空
今雨露恩日夕被蒿艾安坐饑怨天此理果誰在

慘慘晚春樹上下聚百蟲不有口似蠶則生尾如蜂設

不二者然亦徒生無庸清音不可居晚歲還秋風

寄崔伯易 二首

擾擾閭巷士過我何所為屢來徒我煩不來我弗思少年樂知聞喜與客子隨晚歲事恬默與世益參差騎馬出尋人中路輒自歸歸來亦何樂書史自相期已與往者親可無茲世違欲語無所得起視北雁飛

懽懽庭下樹陰影日已敷癯癯閉門人簟席自卷舒高枝就縣冠曲枝挂裳裾還來從此息卧視詩與書拍拍

門外客過從駕驪駒不知彼何聞乃肯顧我問呼兒往
應門謂言出在途非我敢厭客非客與我疎以予拙語
言無以得客娛一不當客意恐與世患俱不如兩相忘
何能效紛如

夢蝗

至和改元之一年有蝗不知自何來朝飛蔽天不見日
若以萬布篩塵灰暮行嚙地赤千頃積疊數尺交相埋
樹皮竹顛盡剝刮况又草穀之根芟一蝗百兒月在孕

漸恐高厚塞九垓嘉禾美草不敢惜却恐壓地陷入海
萬生未死饑餓間支骸遂轉蛟龍醢犀農聚哭天句血
滴地爛皮句蒼蒼冥冥遠復遠天聾不聾不可知我時
為之悲墮淚注兩目發為疾蝗詩憤掃百筆禿一吟青
天白日昏兩誦九原萬鬼哭私心直冀天耳聞半夜起
立三千讀上天未聞間忽作遇蝗夢夢蝗千萬來我前
口似嚙囁色似冤初時吻角猶唧嗾終遂大論如人然
問我子何愚乃有疾我詩我爾各生不相預子何詩我

盡陳之我時憤且驚噪舌生條枝謂此腐穢餘敢來為
人譏爾雖族黨多我謀久已就方將訴天公借我巨靈
手盡拔東南竹栢松屈鐵纏縛都為帚爾納海壓以
山使爾萬噍同一朽尚敢託人言議我詩可否羣蝗顧
我嗟不謂相望多我欲為子言幸子未易呶我雖身為
蝗心頗通爾人爾人相招呼飲啜為主賓賓飲啜嚼百
豆爵主不加詬翻歡欣此竟果有否子盍來我陳予應
之曰然此固人間禮儉介迎召來飲食固可喜蝗曰子

言然予食何愧哉我豈能自生人自召我來啜食借使
我過甚從而加詬爾亦乖嘗聞爾人中貴賤等第殊雍
雍材能官雅雅仁義儒脫剥虎豹皮假借堯舜趨齒牙
隱針錐腹腸包蟲蛆開口有福威頤指轉賞誅四海應
呼吸千里隨卷舒割剥赤子身飲血肥皮膚噬啖善人
黨嚼口不肯吐連牀列筭筮列屋閼嬪姝一身萬椽庇
一口千倉儲兒童襲公卿奴婢聯簪裾犬豕羨膏粱馬
廐餘繡塗其次爾人間兵阜倡優徒子不父而父妻不

夫而夫臣不君爾事民不家爾居目不識牛桑手不親
犁鋤平時不把兵皮革包矛戈張口坐待食萬廩傾所
須家世不藏機繪繡絛衣襦高堂傾美酒嚮肉鱠百魚
良材琢梓楠重屋擎空虛貧者無室廬父子一席居賤
者餓無食妻子相對吁貴賤雖云異其類同一初此固
人食人爾責反捨且句我類蝗自名所食況有餘吳饑
可食越齊饑食魯邾吾害尚可逃爾害死不除而作疾
我詩子言得無迂

張巡

祿兒射火燒九天鬼手不撲神聽旃羣庸仰口不肯唾
反出長喙噓之然睢陽城窮縮死鼈危繫一髮縣九淵
巡瞋晚遠兩眦裂怒嚼齒碎鬚張肩恨身不毛劍無翼
不能飛去殘賊噉翁軀腥刀子磔俎日嚼肉血猶經年
霽雲東攘兩臂去西來才有九指還胸中憤氣吐不散
去隨箭入浮屠塼忠窮智索莫自効更嚮愛妾嘗餓涎
我疑沒日賊不食恐其肉醢死不痊又疑身骨不化土

定作金鐵埋重泉何時山移陵谷變發出鼓鑄戈或鋌
吾如得之願有用不誅已然誅未然

古廟

古廟隆隆敞庭扉風雨剝壁頽柱榱我來安知神所依
穹堂憲宰風幡旗神君龐軀突鬚眉視我睨睨坐倨箕
惕礫觀者駭不怡羣鬼後先張福威直東之廂步逶迤
目益所見怪可噤馬牛羊犬雜豕雞或戴以首旁四支
間有人面身亦非老祝趨前為衆詞口吻囁嚅言嗚呼

稱別狀類顧東西唱號名字分何誰空虛冥漠非所期
豈亦以此為人尸視其膚革已彪狸寧有中反恬肝脾
又有械器身挈持傳言厲疫此乃資古之日行歷虛危
猶恐盛陰鬼所隨磔儼于門驅使馳今安取此廟以祠
不念延虐殆疋羸農凶年多苦餓饑苟幸得飽不擇祈
來則拜叩盡敬祇幸天之澤偷自歸民德且恐報之時
餽肴豐鮮牲魚肥欲奠以獻更濯庖進謝千語拜百低
工鼓于庭巫舞衣祝傳神醉下福禧農謝神去祝徹之

庭前剪割棄餘遺鵲烏下爭趨不飛回顧神面如故時
意者不為祭謝移嗚呼神固非吾知

思京口戲周器之

江南別日醉方醺貪愛青天帶水痕忘却碧山歸路直
誤投浮世俗塵昏終期散髮江邊釣當有漁舟日繫門
但恨故人猶喜仕他時胃腹未堪論

寄柬伯仁

身逐南舟去不迴匡廬留滯得徘徊峰頭夜宿平看斗

巖下朝陰俯聽雷西顧波濤浮日月東歸天地入塵埃
何時得遂幽棲志常把韋編靜處開

紙鳶

誰作輕鳶壯遠觀似嫌飛態未多端纔乘一線憑風去
便有愚兒仰面看未必碧霄因可到偶能終日遂為安
扶搖不起滄溟遠笑殺搏鵬似爾難

古鑑

一片靈光合有神不知鎔鑄竟何人春耕破冢衣冠盡

鬼手摩天日月新
鑑面祇知西子姣
照心難見比干真
主人深有收藏意
當待清明不受塵

九日寄滿子權

懶將衰病照清流
為有歸心欲白頭
幸見好花開便笑
不甘為客自成愁
長歌欲強秋風醉
高處先輸俗子遊
我在無聊元亮死
當年今日共悠悠

答孫莘老見寄

高門鞍馬日光榮
勢力紛紛起共爭
偶以不能聊自便

敢于茲世獨求清生無人愧寧非樂死有天知豈待名
客食官居同偶爾何須稱別異平生

登郡樓

江城朝雨濕晴烟樓上風帆送去船苟得息肩閑歲月
時來開口笑山川田園啼鳥三春日江海扁舟萬里天
何計脫身來此老青山白髮兩忘年

秋日懷子權

樓前暮靄暗平林樓上人愁意思深未必薄雲能作雨

從來秋日自多陰
三年客夢迷歸路
一夜西風老壯心
欲作新聲寄遺恨
直絃先斷淚盈琴

寄介甫

天門廉陛鬱巍巍
勢利寧無澹泊譏
難與跼徒爭有道
好思吾黨共言歸
古人蹢躅今何取
天下滔滔昔已非
終見乘槎去滄海
好留餘地許相依

金山寺

萬頃清江浸碧瀾
乾坤都向此中寬
樓臺影落魚龍駭

鐘磬聲來水石寒日暮海門飛白鳥潮回瓜步見黃灘
常時戶外風波惡祇得高僧靜處看

謝張和仲惠寶雲茶

故人有意真憐我靈薈封題寄華門與療文園消渴病
還招楚客獨醒魂烹來似帶吳雲腳摘處應無穀雨痕
果肯同嘗竹林下寒泉猶有慧山存

劉景文

嘉祐間以左班殿直監饒州酒稅適王安石提點
江東刑獄極賞其詩按劉本名景文季孫其字

也

廣武山懷古

楚漢兵相接乾坤晝亦暝虎爭千里震龍戰四郊腥故
壘從誰問嚴祠自昔靈北風吹敗木落日任飄零

寄蘇內翰

倦壓鰲頭請左符笑尋潁尾為西湖二三賢守去非遠
六一清風今不孤四海共知霜鬢滿重陽曾插菊花無
聚星堂上誰先到欲傍金樽倒玉壺

饒州酒務

風吹燕語落簷間底事驚回夢裏閒說與傍人渾不解
杖藜携酒看芝山

越山寺看泉

龜谿有路蓮花引鷺嶺無時雲霧生聊放此身留蚱蜢
不逢人處聽泉聲

守闕

晨雞三叫未開闕留滯行人更解鞍却上月明高處立

曉風吹面作清寒

陳師道

字履常一字無已彭城人少而苦志力學年十六以文謁曾鞏一見奇之熙寧中王氏經學盛行師道心非其說遂絕意進取元祐初蘇軾傳亮俞等薦于朝起為徐州教授遷太學博士以越境出見蘇軾為言者所中罷歸調彭澤令不赴久之召為祕省正字適遇郊祀行禮寒甚無綿衣妻假諸趙挺之家師道與挺之為寮壻而素惡其人竟不肯服以寒疾卒年四十九

觀亮文忠公家六一堂圖書

生世何用蚤我已後此翁頗識門下士略已聞其風中

年見二子已復歲一終呼我過其廬所得非所蒙先朝
羣玉殿冠佩環羣公神文煥王度喜色見天容御榻誰
復登帝書元自工黃絹兩大字一覽涕無從似欲託其
子天意人與同厯數况有歸敢有貪天功集古一千卷
明明竝羣雄誰為第一手未有百世公廟器刻科斗寶
樽蟠華蟲緬懷弁服士酬獻鳴璫瑤插架一萬軸遺子
以固窮素琴久絕絃棊酒頗闕供向來一辦香敬為曾
南豐世雖嫡孫行名在亞子中斯人日已遠千歲幸一

逢吾老不可待露草濕寒蛩

次韻答秦少章

學詩如學仙時至骨自換縹緲鴻鵠上衆目焉能玩子
從淮海來一啄當百難師儒有韓孟拭目互驚惋老生
時在傍縮手愧顏汗黃公金華伯莞爾回一盼彼方試
子難疾前不應悞要當攻石堅勿作搏沙散植壁雖具
美礧錯加璀璨我老不足畏後生何可慢

示三子

去遠即相忘歸近不可忍兒女已在眼眉目略不省喜
極不得語淚盡方一哂了知不是夢忽忽心未穩

咸平讀書堂

昔人三百篇善世已有餘後生守章句不足供嘖嘖一
登吏部選筆硯隨掃除閉閣畫眉嫵隔壁聞歌呼奉公
用漢律寧復要詩書俛首出跨下枉此七尺軀今代陶
朱公不足大梁屠計然特未用意得輕全吳為邦得畿
縣政密自計疎寧書下下考不奉急急符用意簿領外

築室課典謨平生五千卷還舍不問塗近事更漢唐稍
以詩自娛復作無事飲醉卧擁青奴桃李春事繁軒牕
畫景舒鳴屋鳩渴雨窺簾燕哺雛休吏散篇帙風篁獻
笙竽听然一啓齒斯民免為魚

贈二蘇公

岷峨之山中巴江桂椒枏櫨楓柞樟青金黃玉丹砂良
獸皮鳥羽不足當異人間出駭四方嚴王陳李司馬揚
一翁二季對相望奇寶橫道驥服箱誰其識者有歐陽

大科異等固其常小却盛之白玉堂典謨雅頌用所長
度越周漢登虞唐千載之下有素王平陳鄭毛視荒荒
後生不作諸老亡文體變化未可量萬口一律如吃羌
妖狐幻人大陸梁虎豹却走逢牛羊上帝惠顧被不祥
天門夜下龍虎章前驅吳回後炎皇絳旂丹轂朱冠裳
從以甲冑萬鬼行乘風縱燎無留藏天高地下日月光
授公以柄扶病傷士如稻苗待公秧臨流不渡公為航
如大醫王治膏肓外證已解中尚強探囊一試黃昏湯

一洗十年新學腸
老生塞口不敢嘗
向來狂殺今尚狂
請公別試囊中方

次韻蘇公西湖徙魚

窮秋積雨不破塊
霜落西湖露沙背
大魚泥蟠小魚樂
高丘覆杯水如帶
魚窮不作搖尾憐
公寧忍口不忍鱠
脩鱗失水玉參差
晚日搖光金破碎
咫尺波濤有生死
安知平陸無灘瀨
此身寧供刀几用
著意更須風雨外
是間相忘不為小
濠上之意誰得會
枯魚雖泣悔可及

莫待西江與東海

古墨行

并序

晁無斁有李墨半丸云裕陵故物也往於秦少游家
見李墨不為文理質如金石亦裕陵所賜王平甫所
藏者潘谷見之再拜云真廷珪所作也世惟王四學
士有之與此為二矣嗟乎世不乏奇乏識者耳敬為
長句率無斁同作

秦郎百好俱第一烏丸如漆姿如石巧作松身與鏡面

借美於外非良質潘翁拜跪摩老眼一生再見三歎息
了知至鑒無遁形王家舊物秦家得君今所有亦其亞
伯仲小低猶子姪黃金白璧孰不有古錦句囊聊可敵
睿思殿裏春夜半燈火闌殘歌舞散自書細字答邊臣
萬里風塵入長算初聳橋山送弓劍寧知玉盃人間見
夜光炎炎衝斗牛會有太史占星變人生尤物不必有
時一過目驚老醜念子何忍遽磨研少待須臾圖不朽
明牕淨几風日暖有愁萬斛才八斗徑須脫帽管城公

小試玉堂揮翰手

謝趙使君送烏薪

欲落未落雪近人將盡不盡冬壓春風枝水瓦有去鳥
遠坊窮巷無來人忽聳叩門聲遽速驚雞透籬犬升屋
使君傳教賜薪炭妓圍那解思寒谷老身面直不足云
冷牕凍壁作春溫定知和氣家家到不獨先生席作門
贈知命

黑頭居士元方弟不肯作公稱法嗣外人怪笑那得知

他日靈山親授記學詩初學杜少陵學書不學王右軍
黃塵扶杖笑鄰女白衫騎驢驚市人靜中作業此何因
醉裏逃禪却甚真顧我無錢呼畢曜有人載酒尋子雲
君家魯直不解事愛作文章可人意一人可以窮一家
怪君又以才為累請將飲酒換吟詩酒不窮人能引睡
不須無事與多愁老不欲醒惟欲醉

和魏衍聞鶯

春力著人朝睡重葉底黃鸝鳴自送綠幕朱欄日觀明

回廊側戶風簾動昨夜春回到寒谷好鳥飛來把脩竹
整翰厲觜初一鳴已落君詩專妙獨退紅著綠愁緒昏
後時獨立知何言側聽不盡已飛去懷抱此時誰與論

送江端禮

正學元非世能詩新有聲諸公交郭泰多士閑何生汎
愛經過數移書底裏傾又為淮海別病眼向誰明

登燕子樓

綠暗連村柳紅明委地霞畫梁初著燕廢沼已鳴蛙鷗

沒輕春水舟橫任淺沙相逢千歲語猶說一枝花

寒夜

留滯常思動艱虞却悔來寒燈挑不爇殘火撥成灰凍
水滴還歇風簾掩復開熟知文有忌情至自生哀

九月十三日出善利門

十載都城客孤身冒百艱一饑非死所萬里有生還去
國吾何意歸田病不闕共看霜白鬢似得半生閒

湖上晚歸寄詩友

髭髮難藏老湖山穩寄身却尋方外士招作社中人霜
葉深於染秋花晚自春無人還有礙詩卷莫辭頻

遊鶴山院

積石橫成嶺行楊密映門人聲隱林杪僧舍遶雲根頓
攝塵緣盡方知象教尊只應羊叔子名字與山存

和彥詹題遠軒

開牕得遠意興出杳冥間芳草日邊路片雲天外山好
花和露斲脩竹夾藤刪每許南鄰伴時來一寄顏

次韻無斁雪後

閉閣春雲薄開門夜雪深
江梅猶故意湖雁起歸心
草潤留餘漉牕明度積陰
殷勤報春信屋角有來禽

雪後黃樓寄梅山居士

林廬烟不起城郭歲將窮
雲日明松雪溪山逗晚風
人行圖畫裏鳥度醉吟中
不盡山陰興天留憶戴公

寄潭州張芸叟

湖嶺一都會西南更上游
秋盤堆鴨脚春味薦貓頭
宣

室思來暮蒸池得借留熟知為郡樂不動越鄉愁

蚤春

度臘不成雪迎年遽得春
冰開還舊綠魚喜躍脩鱗
岸柳絲絲發羈愁處處新
老懷吾自異不是故違人

除夕對酒贈少章

歲晚身何託燈前客未空
半生憂患裏一夢有無中
髮短愁催白顏衰酒借紅
我歌君起舞舞潦倒略相同

雪意

榆關書不到雪又滿平蕪指冷頻呵玉胃寒屢掩酥綠
斟冬至酒紅擁夜深爐塞上風沙惡征衣得達無

和黃充實詠榴花

春去花隨盡紅榴暖欲然後時何所恨處獨不祈憐葉
葉自相偶重重久更鮮流珠沾暑雨改色淡朝烟

南豐先生挽詞

蚤棄人間事真從地下遊丘原無起日江漢有東流身
世從違裏功名取次休不應須禮樂始作後生仇

丞相溫公挽詞 二首

百姓歸周老三年待魯儒
世方隨日化身已要人扶玉
几雖來晚明堂訖受圖
心知愛諸葛終不羨曹蜍

少學真成已中年獨著書
輟耕扶日月起廢極吹噓
樂志寧論晚成功不願餘
一為天下慟不敢愛吾廬

野望

霜葉紅于染吹花落更馨
平江行詰屈小徑夾蔥青
度鳥開愁眼遙山入畫屏
畏人惟可飲從俗却須醒

西湖

小徑才容足寒花自送香官池下鳬雁荒塚上牛羊有

子吾甘老無家去未量三年哦五字草木借餘光

第二句

作只
自香

寓目

曲曲河回復青青草接連去帆風力滿來雁雪聲先野
曠低歸鳥江平進晚船望鄉從此始留眼未須穿

晚坐

柳弱知春色梅寒釀雪花溪明數積石月過戀平沙病
減還增藥年侵却累家後歸棲未定不但指昏鴉

宿濟河

燭暗人初寂寒生夜向深潛魚聚沙窟墜鳥滑霜林稍
作他年計初回萬里心還家祇有夢更著曉寒侵

歸雁

弧矢千夫志瀟湘萬里秋寧為寶箏柱肯作帛書郵遠
道勤相喚羈懷誤作愁聊寬稻梁意那復綢羅憂

贈歐陽叔弼

蚤知汝穎多能事晚以詩書託下僚
大府禮容寬懶慢故家文物尚嫖姚
只將憂患供談笑敢望功言答聖朝
歲厯四三仍此地家餘五一見今朝

送蘇迨

胷中厯厯著千年筆下源源赴百川
真字飄揚今有種清談絕倒古無傳
出塵解悟多為路隨世功名小著鞭
白首相逢恐無日幾時書札到林泉

寄亳州林待制

湖海相望闕寄聲
雲林過雨未全晴
青衫作吏非前日
白首論文笑後生
似聽兒童迎五馬
稍修書札問專城
一聞苦李蒙莊句
不復人間世後名

寄杜擇之

詩家兩杜昔無鄰
文采風流世有人
疾置送詩驚老醜
坐曹得句自清新
興來不假江山助
目過渾如草木春
農馬智專吾不讓
衡陽紙貴子能頻

次韻夏日

江上雙峰一草堂
門閤心靜自清涼
詩書發冢功名薄
麋鹿同羣歲月長
句裏江山隨指顧
舌端幽渺致張皇
莫欺九尺鬚眉白
解醉佳人錦瑟傍

春懷示鄰里

斷牆著雨蝸成字
老屋無僧燕作家
剩欲出門追笑語
却嫌歸鬢著塵沙
風翻蛛網開三面
雷動蜂窠趁兩衙
屢失南鄰春事約
只今容有未開花

和李使君九日登戲馬臺

登高能賦屬吾儕不用傳杯擊鉢催
九日風光堪落帽
中年懷抱更登臺江山信美因人勝
萸菊逢辰滿意開
二謝風流今復見千年留句待公來

送晁堯民守徐

中年為別不堪憂束髮登門到白頭
南省望郎仍國士
東方千騎更吾州彭翁老壽終遺骨
燕子飛來只故樓
知已難逢身易邁煩公置醴我歸休

連日大雪以疾作不出聞蘇公與德麟同登女郎

臺

掠地衝風敵萬人
蔽天密雪幾微塵
漫山塞壑疑無地
投隙穿帷巧致身
晚積讀書今已老
閑門高卧不緣貧
遙知更上湖邊寺
一笑潛回萬室春

登彭祖樓

城上危樓江上城
風流千載擅佳名
水魚汴泗浮天濶
山人青齊煥眼明
喬木下泉餘故國
黃鸝白鳥解人情

須知壯士多秋思
不露文章世已驚

和富中容朝散值雨感懷

節物驚心懶復樽
中酒盡復誰賒
風撩雨脚俄成陣
雪閣雲頭欲結花
萬里可堪長作客
一年將盡未還家
自憐落落終難合
白首詩書謾五車

謝贊閣黎見訪

好在談經老上人
衝風踏雪到江濱
百篇出篋自新得
一鉢隨身依舊貧
終歲杜門逃俗士
為師設榻對脩筠

蒲團藜杖焚香坐此意此時無點塵

和沈世卿推官見寄

倦看世態久低徊且置窮通近酒杯未忍一身閒處著
暫容雙眼醉時開為呼阿武扶頭起擬與山公倒載回
好在東籬舊時菊無心準擬白衣來

簡李伯益

蓬鹽度歲每無餘垂索東歸口未餬貧裏交遊新斷絕
老來光景半消除時情視我門前雀人好看君屋上烏

尚喜敝廬連蔣徑願求佳句遞髯奴

九日無酒書呈漕使韓伯修大夫

老大悲傷節物催酒腸枯涸壯心灰慙無白水真人分
難置青州從事來倦筆懶從都市出醉眸剛為麴車回
黃花也似相欺得坐對空樽不肯開

九日寄秦少游

疾風迴雨水明霞沙步叢祠欲暮鴉九日清樽欺白髮
十年為客負黃花登高懷遠心如在向老逢辰意有加

淮海少年天下士可能無地落烏紗

和黃預七夕

盈盈一水不斯須經歲相過自作疎坐待常禽報佳會
徑須飛雨洗香車超騰水部陳篇上收拾愚溪作賦餘
信有神仙足官府我寧辛苦守殘書

次韻李節推九日登山

平林廣野騎臺荒山寺鳴鐘報夕陽人事自生今日意
寒花只作去年香巾幘更覺霜侵鬢語妙何妨石作腸

落木無邊江不盡浮生此日更須忙

和叟梅花

百卉前頭第一芳低臨粉水浸寒光
卷簾初認雲猶凍
逆鼻渾疑雪亦香鼎實自期終有待
天真不假更勻妝
江南望斷無來使且伴詩翁入醉鄉

送王元均貶衡州兼寄元龍

先生秀句滿江東二子緣渠得再窮
詩禮向來堪發冢
孫劉能使不為公
炎方瘴癘消軒豁故國山河閱始終

傳語元龍要相識江湖春動有來鴻

題柱

并序

永安驛廊東柱有女子題五字云無人解妾心日夜
長如醉妾不是瓊奴意與瓊奴類讀而哀之作二絕
句

桃李催殘風雨春天孫河鼓隔天津主恩不與妍華盡
何限人間失意人

從昔嬋娟多命薄如今歌舞更能詩孰如

如一作知

文雅河

陽令不削瓊奴柱下題

偶書

書當快意讀易盡客有可人期不來世事相違每如此
好懷百歲幾回開

絕句

密密丹房疊疊花一枝臨路為人斜丁寧語鳥傳春意
白下門東第幾家

謝趙生惠芍藥

二首

從微至老走風塵喜見鄉園第四春
獨舞東風醉西子
政緣無語却宜人

九十風光次第分
天憐獨得殿殘春
一枝賸欲簪雙髻
未有人間第一人

從寇生求茶庫紙

南朝官紙女兒膚
玉版雲英比不如
乞與此翁元不稱
他年留待大蘇書

十七日觀潮

二首

潮頭初出海門山千里平沙轉面間猶有江神憐北客
欲將奇觀破衰顏

江水悠悠自在流向人無恨不應愁相逢不覺渾相似
誰使清波蚤白頭

放歌行

二首

春風永巷閉娉婷長使青樓誤得名不惜捲簾通一顧
怕君著眼未分明

當年不嫁惜娉婷抹白施朱作後生說與傍人須蚤計

隨宜梳洗莫傾城

俞紫芝

字秀老神宗時人其籍揚州其學浮屠其詩警句多傳於世

南澗月夕

華髮念秋晚青燈憐夜長
香團菊花露寒著橘林霜
月在北牕底人行南澗旁
婆婆不知去身與兩俱忘

旅中諭懷

白浪紅塵二十春就中奔走費光陰
有時俗事不稱意

無限好山都上心一面琴為方外友數篇詩當橐中金
會須將爾同歸去家在碧溪烟樹深

詠草

滿目芊芊野渡頭不知若箇解忘憂細隨綠水侵離館
遠帶斜陽過別洲金谷園中荒映月石頭城下碧連秋
行人悵望王孫去買斷金釵十二樓

歲杪山中

石亂雲深客到稀鶴和殘雪在高枝小軒日午貪濃睡

門外春風過不知

蔡肇

字天啓丹陽人能為文尤長歌詩從蘇軾遊聲譽
甚著第進士歷江陵推官通判常州徽宗初召修
國史以人言提舉兩浙刑獄張商英當國引為禮
部員外進拜中書舍人又以人言落職主宮觀卒

題畫授李伯時

鴻雁歸時水拍天平岡老木尚依烟借君餘地安漁艇
乞我寒江聽雨眠

汎舟橫塘遇雨

平野風烟入夢思
殷勤作畫更題詩
扁舟卧聽橫塘雨
恰遇江南歸雁時

宋元詩會卷三十

欽定四庫全書

宋元詩會卷三十一

兵部主事陳焯編

程顥

字伯淳世居中山徙河南大中大夫珣之子舉進士調鄆上元簿因呂公著薦為中允監察御史裏行神宗素知其名數召見一日從容諮訪報正午始趨出中人曰御史不知上未食乎前後進說甚多嘗勸帝防未萌之欲及勿輕天下士帝俯躬曰當為卿戒之王安石議變法令言者攻之甚力顥被旨赴中堂議事安石方怒顥徐曰天下事非一家私議願平氣以聽安石為之媿屈出知扶溝縣

除判武學究為論新法不合罷歸哲宗立召用未
行而卒年五十四顥與弟師事周敦頤倡明正學
以真儒命世文彥博采衆論題其
墓曰明道嘉定十三年賜諡純公

陪陸子履白石萬固

條山蒼蒼河流黃中蒲形勢天下彊帝得賢侯殿一方
四年不更慰民望元豐戊午季春月上心閔雨愁黎蒼
使車四出走羣望我亦奉命來陝疆精誠感格天意順
詔書才下雨已霽病麥還青禾出土野農鼓舞歌君王
故人相見不道舊為雨歡喜殊未央聖主寬憂小臣樂

自可放蕩舒中腸白石萬固皆勝地主人為我攜壺觴
况逢佳日俗所尚車馬未曉填康莊扶提十里雜老幼
迤邐千騎明戈鎗初聽鳴鐃入青靄漸見朱旒輝朝陽
遨頭自是謝康樂後乘獨慚元漫郎侯來雖知有賓客
衆喜更為將豐穰臨溪坐石徧巘谷幽處往往聞絲簧
山光似迎好客動日景定為遊人長乘高望遠興不盡
戀戀不知岐路忙人生汨沒苦百態得此樂事真難常
我辭佳境已惆悵侯亦那能久此鄉他時會合重相語

辜負泉石何能忘

紫閣

仙掌遠相招縈紆渡石橋
暝雲生澗底寒雨下山腰
樹色千層亂天形一罅遙
使程難久駐回首羨漁樵

陳公廨園修禊事席上賦

盛集蘭亭舊風流洛社今
坐中無俗客水曲有清音
香篆來還去花枝泛復沈
未須愁日暮天際是輕陰

高觀谷

鼻雷疊鼓響前峰
來自彤雲翠靄中
洞穴積陰成虺象
鬼神憑暗擅威風
噴崖雨露千尋溼
落石珠璣萬顆紅
縱有虬龍難作祟
還應不是旱時功

凌霄三峰

長嘯巖東古寺前
三峰相倚勢相連
偶逢雲靜得見日
若有路通須近天
怪石似雷鳴谷底
老松如雪著崖顛
結根不得居平地
猶與蓮花遠比肩

西湖

淇水橋邊鴨子陂樓臺只在郡城西
煙波乍見心先快
島嶼將尋路欲迷
盡日無風橫舴艋
有時經雨飲虹霓
如何咫尺塵埃地
不使遊人續杖藜

和詠草

漸覺東皇意思勻
陳根初動夜來新
忽驚平地有輕綠
已蓋六街無舊塵
莫為枯榮吟野望
且憐愁醉祝香輪
詩人空怨王孫遠
極目萋萋又一春

春日江上

新蒲嫩柳滿汀洲春入漁汀一櫂浮
雲幕倒遮天外日風帘輕颺竹間樓
望窮遠岫微茫見興逐歸槎汗漫遊
不畏蛟螭起波浪却憐清泚向東流

下白徑嶺先寄孔周翰郎中

驟經微雨過芳郊轉覺長河氣象豪
歸騎已登吳坂峻飛雲猶認華山高
門前岐路通西國城上樓臺壓巨濤
欲問甘棠舊風化主人邀客醉香醪

郊行卽事

芳原綠野恣行時，春入遙山碧四圍。
興逐亂紅穿柳巷，困臨流水坐苔磯。
莫辭醖酒十分醉，只恐風花一片飛。
況是清明好天氣，不妨游衍暮忘歸。

春雪

二月將臨尾，羣陰久退潛。
只知桃李艷，何復雪霜嫌。
密霰仍先集，飄雲忽散霑。
帶風成料峭，和雨作廉纖。
江漢初彌望，珠璣間得兼。
片痕才著瓦，斜勢漸穿簾。
烏化遼城鶴，途鋪越女縑。
落英時鬪舞，飛絮或同黏。
寒怯開闌

賞光疑伴月，覘價增樵市。炭興入酒家，帘惜竹頻敲。葉
愁花旋覆，苦失權悲太。皦助虐有飛廉，積勢方平隴。漸
流已墜簷，東君莫惆悵。杲日待重瞻。

草堂

叅差臺殿綠雲中，四面簷簷一徑通。展讀華陽真誥上，
神仙居在碧琳宮。

題淮南寺

南去北來誰得休，白蘋吹盡楚江秋。道人不是悲秋客，

一任晚山相對愁

張載

字子厚長安人少喜談兵年二十一以書謁范仲淹一見知其遠器乃警之曰儒者自有名教可樂何事於兵因勸讀中庸載以為未足又訪諸釋老無所得乃反而求之六經嘗坐虎皮講易京師聽從者衆一夕二程至與論易遂徹坐輟講謂學者曰汝輩可師之吾弗及也舉進士由祁州司法參軍召問治道神宗悅以為崇文院校書歷知太常禮院移疾歸中道而卒所著正蒙西銘二書甚為伊川所服世稱橫渠先生賜諡明

載近觀漢魏而下樂府有名正而意調卒卑者嘗

革舊詞追正題意作樂府

五首

短簫歌

靈旗指不庭方大風泱泱天外揚短簫歌歌愷康朝廷
萬年繼明重光曾孫稼如茨梁嘉與萬邦純嘏有常

度關山

度關山循九州省耕寬徭詢明幽人為貴兮哀我人斯
敢余休

雞鳴曲

雞鳴嘒嘒兮台懷憂兄弟表裏兮台心求黃金門白玉
堂置酒愜樂榮華有光桃傷李僵爾如或忘

燕歌行

小雅廢兮東山不作哀我人斯皇心不樂丞哉斯人胡
然而天兮王師於鑠

東門行

古風出東門我行樂巾綦今歌東門行牽衣彊畱甘餽
康仗劒去予忽如遺時清君去予心衰

移疾

移疾謝華省問耕還敝舍扶持便踈慵曠僻逃將迓晝
暮莎徑側暮粥桐陰下久矣澄清心永愧桑弧射

宿興慶池通軒示同志

清湘庭下千竿竹百尺斑斕聳蒼玉通軒軒外萬頃陂
陂接南山天與齊唐基一壞半禾黍舉目氣象增愁思
我來正當搖落時塵埃七日無人知東平叔子信余友
問學不厭堅相隨君莫痛兮鳳沼湮又莫悲兮花萼墮

所憂聖道久榛塞富貴浮雲眼空過明發余西叔且東
高談更為通宵坐

題館壁

壁門金闕倚天開五見宮花落古槐明日扁舟江海去
却從雲氣望蓬萊

別館中諸公

九天宮殿鬱岩堦碧瓦參差接絳霄
藜藿野心雖萬里不無回戀向清朝

畢仲游

字公叔鄭州人文簡公士安曾孫也與兄仲衍同登第官主簿轉運司元祐初召試學士院擢第一歷官清苦終始不渝士林賢之以祕閣校理出知耀州淹黨籍卒年七十五

寄鄭介夫

鄭子安彊否梅花萬里春如何投虎穴直欲犯龍鱗北闕今無數南方信有人可憐妻子在年少不謀身

劉跂

永靜東光人尚書右僕射劉摯之子摯為章惇蔡卞所陷寃未白而卒徽宗立跂伏闕訴誣得復職

予贈諡政遭黨事為官落拓
家居避禍能詩文以壽終

題半隱堂

一堂圖籍自陶冶三徑蕭蘭俱歲華定非平恩許侯宅
曾是仲長公理家端居雅不煩拊擋佳設頗曾成咄嗟
惟我身閒數來往微絃一泛即生涯

任伯雨

宇惠翁眉山人父牧學行與蘇洵齊名鄉里伯雨
自幼已矯然不羣文本經術中進士第調施州清
江主簿知雍丘縣召為宗丞擢右正言首擊章惇
貶雷州繼論蔡卞六大罪建中靖國元年當國者

欲主調停故以中為名伯雨倡言唐惠宗時正坐
君子小人雜進以致播遷建中乃其紀號不可不
戒居諫省半年所上一百八疏大臣畏其多言諭
以少默即實授給事中伯雨不聽抗論愈力且將
劾曾布布覺之徙為度支員外郎尋知虢州崇寧
黨事作削籍編管通州蔡卞等猶未甘心復用匿
名書逮其子赴獄鍛鍊無所得始釋之伯雨徙昌
化三年而歸宣和初卒年七十三高宗初贈諫議
大夫後
諡忠敏

述懷

元符庚辰歲孟冬十二日任子丞太宗碌碌奉朝籍聖
主訪落初聽言勞日是諫路員有闕求人恐不及誰謂

方遴選邂逅首踈逖詔旨忽中授輦命旦夕惕平生慕
古人素願或可畢精神倍疏淪激昂登文石青雲開九
天清光親咫尺每見情益交肝膽盡剖析敬承丁寧訓
重許以忠直自喜千載遇奮身遑他恤志欲收主威力
先排巨室切齒憤欽永刻意望夔稷哀哉愛君心不能
當衆嫉投湘為獨醒得罪因懷璧尚賴天德廣閱歲已
再謫仇人意未厭窮荒必投斥轉海僅萬里艱危備經
歷有時遭颶風天地如抹漆雪浪山崩頽轟礮飛霹靂

扁舟甚桔槔俯仰顛倒立雙檣捲欲折繩斷水蘸席鯨
鱷口垂涎噴吐煙雨集萬怪競周章腥臊助噓吸平生
仗忠信安敢保瞬息蜚緣脫魚腹島嶼稍登陟天氣鬱
欲流土色焦成赤草木蒸氛霧亭午日未出荒徑少人
行憲宰走虺蜴居民傍溪許橫崖戶百十矮屋盡柵欄
臭穢如圈檻家家啖菜粥雜米無十一小魚與細鰕相
尚珍鼎食鳥言分嘲哢卉服盆蒙羃顏色盡黃腫大半
抱瘴疾其風貪以淫其俗拙以僻殆非人間世宜爾太

荒聞我生本匹夫賦性自真率雅有江海志仕宦特牽
迫一日偶遭際用舍何敢必但思忠邪分於國繫休戚
浴渙有竭時我意何窮極

元日

憶昔東班賀紫宸和風佳氣淨無塵龍墀初下鬴稜日
旌扇齊開玉座春接武九霄曾近侍投荒三載作流人
窮通忤合雖大理俯仰尋思不為身

感古

指鹿姦謀豈偶然、都緣人事不由天、要知左右皆言馬、只為當時殺正先、

鄒浩

字志完常州人第進士調潁昌教授元祐中上疏論事將用為太常博士來之邵論罷之哲宗親擢為右正言請試士勿書王氏經義時章惇獨相用事威權震赫浩持議每觸忌諱仍上露章劾其不忠侵上適賢妃劉氏立為后浩力陳不可章惇詆為狂妄落職羈管新州徽宗卽位召復右正言遷左司諫改起居舍人進中舍俄用兵吏二侍出知江寧府徙杭越州初浩還朝帝首嘉歎其諫立后事因問諫草安在退曰焚之矣退告陳瓘瓘曰禍其在此乎及蔡京當國果忌浩使其黨為偽疏以

激上怒再責衡州稍復閣直以瘴疾卒
年五十二高宗朝贈直學士賜諡忠

秋蠅

秋風快如刀著木木欲折蕃鮮轉淒淒入眼無一悅青
蠅獨何為飛鳴猶未滅造化本無私爾生一偶竊念方
三伏中日車午停轍下照人世間何異紅爐熱勁鳥倦
戢翼獐獸喘吐舌惟人於此時體懈劇疲茶虛堂幸可
逃枕簟隨意設好睡邊韶同素懶嵇康埒更此值清涼
酣寢謂須決雙睫纔欲交汗膚遭爾齧營營不絕聲宛

類讒口，哂使我寢不安。欲息還復摯，況如一簞貧。未能
萬錢歡，園蔬薦脫粟。杯盤殊減裂，雙筋纔欲拈。咀嚼遭
爾餐，適從何處來。食飲汗修潔，使我味不甘。欲嘔還復
噎，毆除付疲兵。祇足增跛蹙，宜哉孫權彈。為爾情激切，
期望秋風回。一掃無餘孽，偶此延朝昏。勿謂風不烈，氣
候侵凝凜。龍蛇且藏穴，爾形大豆然。豈能堅如鐵。

別零陵

零陵距中邦，道阻五千里。我以放逐來，本非心樂只身。

止高山巔忽忽彌半襪人情久自親況復多可喜坐使
故鄉念如火沃之水罪大不得留今茲動行李昭州雖
嶺南流寓蓋均耳儻未還庭闈在彼猶在此胡然當作
離耿耿殊不已物我要兼忘咄哉從此始

詠路

赤路如龍蛇不知幾千丈出沒山水間一下復一上伊
予獨何為與之同俯仰

王景亮攜晁無咎清美堂記來求詩為賦此

先生不出二十年幅巾種樹老盧泉
盧泉水木清且妍
築堂流水茂樹間
晁侯作記筆如椽
画欄素壁青瑤鐫
明珠白璧光射天
先生矜詫喜欲顛
春歸野岸綠漪連
青山東缺如斷環
雲消風軟山蒼然
杏梢紅破臘脂寒
先生醉狂夢思山
自駕草車東塵編
上堂讀書門晝關
金徽朱絲弄猗蘭
相思古人太古前
若非豪士魯仲連
即是幽人梁伯鸞
先生好學老益堅
少時不信功名艱
青衫屢補鞞
決穿晚知有命絕
可憐歸來自買汶上田

穠粧香露凝秋殷只知留客有酒錢
肯問釜粥寒齏酸
拖金曳繡卷曉班何似布褐煖
且寬先生所願一何廉
貴人孰與先生賢朱門銅臭厨肉羶
夜闌白月照管絃
美人一笑天桃然安知賢達死丘園
正恐後世終無傳
此意已輸先生先我今欲歸無由緣
蕙帳依約聞清猿
何時相從一醉眠德公渡汚應已還
山中桂枝聊攀援
次韻崔光先見簡作詩催春色

春遊有客忘朝暮
酷似經星好風雨
豈知仲蔚長蓬蒿

寂寂儒宮裁一畝新詩故委黃耳來舌在驚疑為頻吐
鴻鈞密運掃轍蹤萬物終然歸鼓舞去年枯槁欲樵蘇
今已蕃鮮媚農圃我家吹律信參天苗裔非才聞無覩
族寒官冷自離奇安能仰贊媯皇補廟堂燮理皆少年
佇見囊金罄花塢

代書招德符

北風鳴四野饑鳥下黃昏寒燭照無寐孤懷誰與論伊
余賦招隱撫事倍銷魂莫使衡門下朝來獨負暄

次韻錢忠雪中

六出飛瓊玖雲愁正臘天寒聲生密竹爽氣徹純綿故
苑風初靜重樓月向圓何當酬此景蘸甲引金船

入試院呈同事章顯父推官及監試柴承之朝奉
漢江洶洶不知休江上譙門鼓角秋匹馬崎嶇隨國事
同心邂逅得儒流何妨蟋蟀牀頭急況是芭蕉雨脚收
別乘端容共蕭散從今相與傲浮丘

又得數文書

一封黃勅下天關
嶺表湖南破旅顏
吏部回頭真可笑
拾遺作伴竟同還
張公洞裏花流水
揚子江邊雪滿山
更約家居多暇日
相從莫遣鬢毛斑

昭平別元光

不因投鼠抵昭平
那得相逢一笑親
塵裏豈知居士意
山中聊見宰官身
周顒尚以家為累
元亮惟知酒是真
莫逆于心更何語
撥開船子過醪津

昭州北還過滑石泉

馬頭今日過嚴關十九年前去復還惟有流泉聲似舊
憑欄重聽響潺潺

從昭州北還過永州澹山巖有狐鳴之異

我入幽岳亦偶然初無消息與人傳
馴狐戲學仙伽客
一夜飛鳴報老禪

游 酢

字定夫建州建陽人與兄醇以文行知名程頤見
之京師謂其資可以進道程顥興扶溝學招使肄
業盡得其學第進士調蕭山尉用薦召為太學博
士以養親求知河陽縣晚得監察御史出知漢陽

軍和舒濠
三州而卒

歸雁

天末驚風急江湖野思長
悲鳴愁絕塞接翼冒風霜
澤岸多矰弋雲間乏稻粱
茫然棲息地飲啄欲何鄉

感事

世事浮雲薄勞生一夢長
散材依櫟社幽意慕濠梁
風激鷹鷂迅霜殘草木黃
投閒如有約早晚問耕桑

遊寶應寺

峯律三峰帶白灣誰開蘭若翠微間竹牀雲懶禪心定
草徑苔荒屐齒斑天入碧嵐成玉宇鳥飛青嶂出塵寰
此中即是藥珠境遮莫閒吟一解顏

楊時

字中立南劍將樂人幼穎異潛心經史熙寧九年
中進士第時河南二程講孔孟絕學時調官不赴
以師禮見穎於潁昌相得甚懽其歸也穎目送之
曰吾道南矣後又見程頤於洛年已四十一日值
頤瞑坐時與游酢侍立不去頤既覺則門外雪深
一尺矣歷知瀏陽餘杭蕭山三縣皆有惠政轉荆
州教授德望日重四方之士千里從遊號曰龜山
先生會有使高麗者國王問龜山安在使回以聞

徽宗召為著作郎面對陳時政甚切除通英殿說
書進諫議兼侍講金兵圍京城時條陳戰守機宜
皆不能用欽宗朝兼國子祭酒首請黜王安石從
祀而諫官馬漈力右王氏上疏詆時遂罷祭酒除
徽猷閣直學士提舉崇福宮高宗立
擢工部侍郎告老致仕卒年八十三

遊武夷

函關崎嶇走秦鹿天下並逐爭羣雄抉雲翻空鼇足折
黔黎竄涌如寒蛩武夷山深水清泚避世猶有高人蹤
龍泓東注海波涌玉女翠擁秋雲鬆赤霄真骨寫虛壁
通泉凡筆慙非工藏舟浮梁跨絕壑隱見似與天潢通

當時雞犬不復見，窠巖依舊煙霞籠。
我來秋杪月既望，尚有幽菊埋榛叢。
天容洗淨雨新霽，雲幕四卷清無風。
掀蓬進櫂窮異境，注目想見流殘虹。
回船杖屨躡幽徑，松竹窈窕環琳宮。
自憐病骨挂塵網，幔亭高會何由逢。
解衣歸卧玉瑣碎，仰看明月穿疎蓬。

岳陽書事

洞庭水落洲渚出，疊翠疏峰遠煙沒。
重樓百尺壓高城，簷瓦參差倚天闕。
湖光上下天水融，中以日月分西東。

氣凌雲夢吞八九欲與溟渤爭雌雄
澄瀾無風雨新霽
一日萬頃磨青銅瑠璃夜影貯星漢
騎鯨已在銀河中
湘妃帝子昔何許但有林壑青浮空
蒼梧雲深不可見
遺恨千古嗟何窮須臾晦冥忽異色
風怒濤翻際天黑
乘陵瀨壑走魑魅渟渟百怪誰能測
忽看舟子玩行險
更欲飛帆借風力安得晴雲萬里開
依舊寒光浸虛碧

寄范正甫

羈窮莫厭如牢圈從古功名出屠販
男兒不負縣弧心

馬革裹尸猶足願君不見淮陰寄食饑貧叟胯下英風
亦何有逢時吐氣雷電奔金印纍纍大如斗玉門晝夜
羽檄驚睥睨欲塹天都城叩關虎士鬱餘怒科頭奮戟
如鵬鷹君從壯年蘊奇策未宜縮首藏柴荆昔人投筆
真豪杰慨然萬里終成名南山白額雖欲老百獸遭之
猶裂腦

偶成

天遠何須問勞生聽若何犂鋤三畝足栖息一枝多白

雪寧堪冒清時只浪過好尋明月影醉舞自婆娑

泛江至土坊

萬頃江湖遠孤乘一葉船鴈飛雲外字蓬掩水中天波
靜櫓聲息風彊帆影偏回環聊注目浩蕩接青煙

用韻和早梅

楚國春歸早寒梅處處開月和清艷宿天與靚粧來東
閣詩懷動南枝歲律回蕭然冰雪態無處覓輕埃

漢坂舟行

曲岸通幽徑疎籬映竹斜
塢深藏吠犬林薄露人家
石瀨魚偏美鄰村酒易賒
祇應雲水富自足一生涯

湘君祠

鳥鼠荒庭暮秋花覆短牆
蒼梧雲不斷湘水意何長
澤岸蒹葭綠籬根草樹黃
蕭蕭竹間淚千古一悲傷

潁昌西湖泛舟

春過鶯花無處尋
移舟行近古城陰
褰衣水上收殘片
傾耳枝間覓好音
山隔曲堤迷遠近
魚跳文藻亂浮沉

飄然自得江湖趣
陡起歸與萬里心

送丁季深

煙含疎柳綠蒙茸
杏頰桃英入眼紅
邂逅與君逢臘雪
飄零獨我過春風
空愁轉轂音塵遠
且寄離懷笑語中
後夜月明人寂寂
相思那復一樽同

蘄州早起

城頭雷動角聲哀
似共行人怨落梅
欲報晨炊梁未熟
喚回殘夢眼慵開
霜清暗覺貂裘冷
月淡空令犬吠猜

倚杖起看風正烈，不堪嘶馬重徘徊。

寄長沙簿孫昭遠

陽城衰晚拙催科，闔寢空慙罪亦多。
祭竈請憐君自適，載醪祗感我誰過。
猗庭有蘭堪佩寂，寂門無雀可羅歸。
去好尋溪上侶，為投纓紱換漁蓑。

席上別蔡安禮

故里相看眼暫明，一尊聊此話平生。
杜陵蚤被微官縛，元亮今為世網撓。
長路關山吾北去，春風梅嶺子南征。

結隣莫負當時約早晚滄浪共濯纓

汴上

天上行雲曳白衣半銜晴日在林扉盤花落鴈驚還起
啄食饑鳥趁不飛榆莢青錢飄已盡月堤流水澣相圍
征途處處塵隨眼多病長年與世違

荊州書事

千里瀕江地可毛結廬何必故山椒載醪不過斜川路
飲水誰同陋巷瓢勿問雞蟲閒得失但知鵬鷃各逍遙

黃塵滿眼僧窗靜坐對風花意已消

直舍大風書事寄循道

枕書無寐首空搔萬竅噓風正怒號雪意浮空迷遠目
月林梳影見秋毫幽庭所藉惟荒草妙理應須付濁醪
誰念維舟江上客落帆千里壓雲濤

劉 弇

字偉明吉州安福人兒時警敏日誦萬餘言登元
豐二年進士知嘉州峨眉縣改太學博士元符中
有事于南郊弇進南郊大禮賦哲宗覽之動容以
為相如子雲復出也除祕省正字徽宗即位改著

作佐郎實錄檢討官以
疾卒有雲龍集三十卷

感遇 二首

嬖媚誰家子粲粲生輝光
弄姿俯春蘭臨風振微芳
秋水揚清矚白玉雙明璫
問渠家何許笑指南山陽
去去不輟軌恍若遊雲翔
遙看入縹緲明月斷人腸

疾雷疑車音出門乃知非
抱影長自明流螢點霜幃
羅帶剪秋水黃金縷春衣
持看清夜闌愁非故時輝
食葵心知傾茹蠟腸虛肥
纂纂棗下歌惜此歲月違
因聲勸

語儂勿復遲遲歸

宿長山寺

蒼山兩蟠虬傑勢分天矯不緣事幽尋茲地終難到破
暝紫煙生寫谷清樾好村長下牛羊雲綻入歸鳥松風
卷孤磬夜半秋聲小客懷方未央千里漫白道庭樹一
鳥驚愁看楚天曉

送邢清臣赴左選

泊舟梅林浦解纜墨潭灣層波日日生雙槳那得閒龐

看青翰客相與春風還江梅吹欲盡岸柳未勝攀無以
持贈君對君成彊顏官況更新好晚步非閒闕直北清
夢多半落夷門山慙慙尺素語勿為魚鴻慳

癸酉歲暮壽春道中

有城有城半蕪沒倔彊當年開狡窟青韁白馬成底事
魏得其狗空凌突清淮不洗餐利腸石馬崔嵬化英物
據鞍浩歎為踟躕但見悲風起蓬勃

石廊洞

君不見仙家三十六洞天西南大半盤蒼巔此外元揚
擅嶄絕況有石廊人喜傳碧蓮參差隅地湧徙倚危梯
飛蟬螻陰陰洞戶半空開一縷聯回愁寄種萬鈞崔嵬
挂礪石吁可怪兮若飛動天然湫面尋丈間寒掬初慳
媪神捧紫厓蒙茸瑤草秀縣泉涓涓把天酒淑靈豈即
乾坤私窟宅宛是神仙舊飛鳥點影陽光回遊子履深
驚殷雷九夏三冬自回斡雨暘寒燠爭喧聒神物奄有
似無謂突兀古廟當巖隈鼃鼃笑舞助怪變落日愁絕

松風哀瞰臨一方殆天意累露之疑此其是仙乎仙乎
胡不歸忍使秋燐泣陰鬼

人日

去年人日螺江邊今年人日在通川家國浩蕩五千里
客子騷屑心茫然霜蘆盡解故時葉生意陡爾歸蘭荃
海風如刀水塞渡欲航野水雪暗天他鄉信美非吾土
香草悅魂真浪傳南冠故聲祗操楚劉章雅志惟歌田
五乘如單費廩粟一囊就盡持餐錢顛毛冉冉不吾與

齒根浮動輕于翹小雀誰言畏死鷄未肯屈折同枯椿
章貢直西三徑在爾來望眼欲成穿科桑洗竹真吾事
孰使齷齪纔充員何時解得無拘束歸釣潭頭楓葉編

宿法藏禪院

斜河左界縣朱提冷燼掠天螢糝飛高梧泣液涼參差
前村後村烏夜啼雕甍繡拱絕坤維知自在世張禪扉
有睨釋子龐兩眉清梵一聲捐翠微亂我心曲天之涯
寂歷故感迎新悲歸歟誰是真忘機獨鹿水深愁濁泥

村南

村南行吟踏新場馬乘欸段壺縣漿如稼濃雲穠含黃
柿葉亞枝收趁霜臘團雞髀盤餽香簫鼓下神巫正狂
呼兒往問當壚娘清美何如顧建康

安成道中作

二首

故家楚尾隣三湘粗有晴地麻與桑利機未判身輕嘗
生涯寄將一葉上歸釣賴尾秋滄浪

翠篠娟娟棲暗芳半隱半見誰門牆分曹戲兒疑雁行

今我垂垂老境逼竹馬鳩車憐汝狂

夜歎

丹鳥白鳥爭吞吐還雲去雲無定度不無夏簟工熨體
況有秋蠶競扶戶一嘅三嘆詎如許客思紛紛野煙縷
宵明景晏掛斜河叢萱苒弱團清露有美一人在西方
白玉珮環珠兩璫明眸皓齒艷朝陽企予望汝涕滂皇
安得灑汝羅衣裳

杉溪驛

竹巖杉溪道路長道邊古驛開蒼茫分流溪水薄枉渚
挨石人家環上方王程星火何時歇霜冬草樹芸其黃
去來今昔幾男子姓字喧傳兩女郎

秋日儀真即事

秋風來從越天末痛洗玻璃出明月雲罍隱起玉龍眠
下有春容萬濤雪獨繭之綸歌一葉半酣老魚擢歌發
客心寸許了無多底事臨風吹欲折

持釣

艇子悠揚打雨來
嫋絲越箭青玫瑰
昨聞古湫新雨足
漲波泛入西溪來
西溪兩岸行人少
白鷺對翹佳客陪
低雲弄嬌不成去
半與枉渚相縈迴
藻間賴尾廁銀鯽
正爾作羣爭曝腮
故應沈餌得所置
行醉甕頭新熟醅

遊麻姑觀用黃道士韻

鳥道參差掛空白
雲林曾是飛昇迹
漫論滄海復揚塵
已識松杉老岑寂
玉駕斑龍飛九色
古殿崔巍遺石刻
會須揖彼丹丘人
掇拾頽年茲偃息

蔣沙莊居

四首

他日蓬蒿地吾廬瓦數溝井泉甘勝乳庭竹冷先秋村
巷時情淡田疇歲計優荆扉論日掩最喜近松楸

晴屋鳴鳩婦春陂翳雉媒飭頭甘野蔌鋤力到陳荻掠
水千艘健橫風一笛哀最憐雙白鳥解事等閒來

名愧周繁弱材非魯孟勞蛙仍當鼓吹徑任沒蓬蒿紫
芋新厨味黃橙馥鱸刀業詩何水部耽酒阮兵曹

劉宗墳墓國金水眇縈回鼃鼃鴉巢覆疎疎槿戶開春

風持贈柳臘雪試粧梅欲識塵埃少元無俗物來

莆田雜詩

四首

清樾陂陀外春深四五家叢祠下簫鼓平楚暗桑麻水
國潛虬傲天程去鳥賒仙山仍在目瀟灑送生涯

梅雨催農鑄癡風泣海檣魚龍波浪濶燕雀戶庭涼
桂春剗玉蟾山夜鑿霜家園雨痕淚早晚促吾裝

鷓鴣青春晏鵲鵲白社驕掠風雛燕翼界雨晚虹腰
醪銀牀溼丰茸紫澗苗到家幸無苦浦溆有回潮

鶴唳歸雲急，龍移過雨腥。
桂清飄月岫，槎老卧煙汀。
洞失壺公舊，雲傳妙應靈。
不緣幽事隔，小復理篁屏。

試院次韻奉酬趙達夫記室惜春之什

風酣雨軟，媚簷絲坐負吾人。
痛飲時使者，嶺梅傳信遠。
王孫芳草，怨歸遲，釀成紫府無端。
夢開到朱欄，第幾枝欲問東君，挽流轉。
顛狂好在曲江詩。

九曲池

昔帝檣烏下，日邊曾留清蹕。
此蹕躑魚龍窟，暗浮春漲。

鳬雁行低破暝煙
星閣催頽空歲月
蕪城埋沒舊山川
後庭一曲陳歌歇
更看當年水調傳

春日送簽判楊承議

春山野思萬千重
那更江頭來送公
別淚滴流紅杏雨
離情搖曳綠楊風
一枝易遶南飛鵲
隻字難憑北塞鴻
惟有感恩情不斷
夜深長入夢魂中

春日舟中即事

不因門有北堂親
肯泛孤舟瘴海濱
萬里江湖愁去客

一春風雨厭行人花朝水國留題懶月夜鄉園入夢頻
每被煙波驚破膽却思雲石自由身

張 繹

字思叔河南壽安人家甚微年長未知學偶有感
觸即發憤從師友問業以文名程頤甚器之嘗言
吾晚得二士謂
繹與尹焞也

寄友人

有客厭事事潔身山之幽寒暑不相貸乃有卒歲憂有
生此有事簡之成贅疣澄江本無痕不如信虛舟六經

力道要無以利心求一朝與理會萬境真天遊伊水正
清冷子行無滯留西風昨夜至送子馳中流落月灑殘
夢已著古岸頭我病彊送君是行良難儔異時青門下
誰識東陵侯

田 畫

字承君陽翟人樞密使田況之從子以任為校書
郎歷知西河縣淮陽軍有善政兩地皆德之淮人
祀為土神少與鄒浩以氣節相激礪浩之諫立后
也畫實慙愚之宋文鑑載有田畫以史考証當即
是畫姑
記於此

築長堤

築長堤白頭荷杵隨者妻背脇偃僂筋力微以手置胸
路旁啼老夫七十嫗與齊五尺應門生兩兒夜來春雨
深一犁破曉徑去畊南陂南鄰里正豪且彊白紙大字
來呼追科頭跣足不得稽要與官長修長堤官長亦大
賢能得使者意上堤駕輶軒不復問餘事終當升諸朝
自足富妻子何惜桑榆年一為官長死

杜牧

弟病兄孤失所依當時書語最堪悲豈圖乞得南州後
却恨尋芳去較遲

羅從彥

字仲素南劍人以累舉恩為惠州博羅縣主簿聞
同郡楊時得河南程氏學慨然慕之及時為蕭山
令遂徒步從學焉時熟察之喜曰惟斯人可與言
道從彥初見時三日即驚汗浹背曰不至是幾虛
過一生矣既而築室山中絕意仕進嘗采祖宗故
事為遵堯錄靖康中擬獻闕下會國難不果紹興
中卒學者稱之
曰豫章先生

挽吉溪吳助教

新生誇躑躅舊德歎凋零
冷帶商巖月光凌處士星
布衣難得祿白首易窮經
追想今何在溪流對洞庭

和延年巖桂

幾樹芬芳氣欲沈
枝枝若占卻家林
風搖已認飄殘菊
日照渾疑綴散金
仙窟移來成美景
東堂分去結清陰
我今不願蟾宮折
待到秋宵把酒吟



宋元詩會卷三十一